

दिनांक 19.03.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- लोकसभा चुनाव रा पैला दौर सारू अधिसूचना काल जारी करी जावेला-प्रदेश री 12 सीटां माथे पर्चा दाखिल करण रो काम सरू व्हेला।
- राज्य मांय स्वीप रा तैत रैलियां, नुक्कड नाटक अर होडां रे मार्फत वोट जरूर देवण रो संदेश दियो जा रहयो है।
- लोकसभा चुनाव सारू कांग्रेस पार्टी रा चुनाव घोषणा पत्र ने मंजूरी देवण सारू नई दिल्ली मांय कार्य समिति री मीटिंग व्ही- भारतीय जनता पार्टी री क्लस्टर संभाग स्तर री बैठक जोधपुर अर उदयपुर मांय व्ही।

अर

- राष्ट्रीय महिला आयोग अर रेलवे सुरक्षा बल मानव तस्करी रोकण सारू करार माथे सही कीनी।

000

लोकसभा चुनाव रा पैला दौर री अधिसूचना काल जारी करी जावेला। ई दौर मांय 17 राज्यां अर केंद्र रा राज वाळा चार प्रदेशां मांय 102 सीटां माथे चुनाव सारू वोट पड़ेला। आं मांय प्रदेश री ई 12 सीटां श्रीगंगानगर, बीकानेर, चूरू, झुंझुनू, सीकर, जयपुर, जयपुर ग्रामीण, अलवर, भरतपुर, करौली-धौलपुर, दौसा अर नागौर शामिल है। अधिसूचना जारी व्हेवण सागे ई पर्चा दाखिल करण रो काम सरू व्हे जावेला। नामपाना 27 मार्च ताई दाखिल कर्या जा सकेला। भरी ज्या पर्चा री जांच 28 मार्च ने व्हेला अर उम्मीदवार 30 मार्च ताई नाम पाछा ले सकेला। ई दौर मांय 19 अप्रैल ने वोट पड़ेला ज्यां री गिणती चार जून ने करी जावेला। राज्य मांय लोकसभा चुनाव रा पैला दौर मांय 19 अप्रैल ने अर दूजा दौर मांय 26 अप्रैल ने वोट पड़ेला।

0000

प्रदेश री जनता मांय वोट देवण बाबत् जाग जगावण सारू चलायी जा रही स्वीप गतिविधियां रा तैत आज डूंगरपुर री चिखली पंचायत समिति मांय निर्वाचन विभाग री ओर ऊं रैली निकाली ज्यी अर 26 अप्रैल ने बत्ता ऊं बत्ता मतदातावां ऊं वोट जरूर देवण री अपील करीजी। ई मौके लोगां ने वोट देवण री सौगंध ई दिरायी ज्यी। झालावाड़ मांय वॉकेथान राख्यी ज्यी, जिण ने वठै मौजूद बुजुर्ग मतदाता हरी झण्डी बता र रवाना कीनी। बूंदी मांय स्वीप कार्यक्रम रा तहत कार्यक्रम राखण रा बारा मांय विचार करण सारू आज जिला परिषद रा मुख्य कार्यकारी अधिकारी दुर्गाशंकर मीणा री सदरत मांय मीटिंग राख्यी ज्यी। श्रीगंगानगर जिला मांय लोकसभा चुनाव मांय वोट जरूर देवण सारू नौजवानां मांय जाग जगावण बाबत् भारत री 19 साल ऊं कम उम्र रा क्रिकेट खिलाडियां री टीम रा कप्तान उदय प्रताप सहारण ने यूथ आईकन बणायी ज्या है। जिला कलेक्टर रा दफतर मांय राख्यी ज्या कार्यक्रम मांय जिला निर्वाचन अधिकारी लोकबंधु, यूथ आइकॉन सहारण दूजा अहलकारां सागे यूथ आईकन पोस्टर रो विमोचन कीनो। ई मौके सहारण 19 अप्रैल ने बत्ती ऊं बत्ती तादाद मांय नौजवानां ऊं वोट देवण री अपील कीनी।

.....

जोधपुर जिला परिषद रा मुख्य कार्यकारी अधिकारी री सदरत मांय आज न्यारा-न्यारा महकमां अर विशेष योग्यजन संस्थानां रा नुमाइंदा री स्वीप गतिविधियां रा बारा मांय समीक्षा बैठक राख्थी ज्यी। ई दौरान आवता 30 दिन री चुनाव ऊं जुडी कार्ययोजना रा बारा मांय विगतवार चर्चा करी ज्यी। मीटिंग मांय चुनाव ऊं जुड्या न्यारा-न्यारा एप री जाणकारी ई दीरीजी। बाड़मेर जिला री फागलिया पंचायत समिति मांय ग्राम पंचायत गिडा री न्यारी-न्यारी स्कूलां रा विद्यार्थी आज मतदाता जागरूकता रैली निकाळी। ई सागे ई रंगोली मांडण, मेहंदी मांडण, भाषण देवण अर नारा लिखण री होडां रे जरिये वोट देवण रो संदेश दियो ज्यो। चूरू मांय नुकड्ड नाटक रे मार्फत वोट देवण रो महत्त्व बतायी ज्यो। टोंक जिला रा देवली उपखण्ड मांय देवडावास री सरकारी सीनियर सैकण्डरी रा विद्यार्थी मानव श्रृंखला बणा र वोट जरूर देवण रो संदेश दीनो। स्कूल रा प्रधानाचार्य जय कुमार जैन बतायो के प्रार्थना सभा मांय विद्यार्थियां ने रोजीना वोट देवण रा महत्त्व री जाणकारी दी जा रही है। नागौर मांय वोट देवण रा काम मांय आवण वाळी ईवीएम-वीवीपेट मशीनां रो जिला निर्वाचन अधिकारी, चुनाव ऊं जुड्या अहलकारां अर सियासी पार्टियां रा नुमाइंदां री मौजूदगी मांय पैलो रेंडमाइजेशन करी ज्यो। सवाईमाधोपुर मांय अल्पसंख्यक मामलात विभाग री ओर ऊं जिला मांय पंजीकृत सगळा मदरसां, आवासीय स्कूलां अर बालक छात्रावासां मांय स्वीप रा तैत कार्यक्रम राख्थी ज्यो। ई रा तैत आं रा विद्यार्थियां मांय 26 अप्रैल ने वोट जरूर देवण बाबत् जाग जगायी ज्यी अर वां ने वोट जरूर देवण री सौगंध दिरायी ज्यी। विद्यार्थियां ने 1950 मुफ्त नम्बर, वोटर हैल्पलाईन, सी-विजिल अर सक्षम एप रा बारा मांय जाणकारी दीरीजी। स्वीप रा तैत मानव श्रृंखला, रंगोली, रैली, पोस्टर, बैनर सरीखी होडां रे मार्फत वोट देवण रो संदेश दियो ज्यो। अलवर मांय मिनी सचिवालय ऊं इंदिरा गांधी स्टेडियम ताई रन फॉर वोट री थीम माथे मतदाता जागरूकता कार्यक्रम राख्थी ज्यो। बीकानेर री जिला निर्वाचन अधिकारी नम्रता वृष्णि ई स्वीप कार्यक्रमां रा बारा मांय आकाशवाणी सागे बातचीत कर र खास जाणकारियां दीनी।

000

लोकसभा चुनाव ने ध्यान राखता थकां प्रदेश मांय ई चुनाव आदर्श आचार संहिता री पालना करावण सारू पुलिस अर प्रशासन लगातार कोशिश कर रह्या है। भरतपुर मांय पुलिस कानी ऊं चलायी ज्यो खास निर्भय अभियान रा तैत 258 बदमाशां ने गिरफ्तार करी ज्यो। बदमाशां ने पकड़बा सारू पुलिस री 88 टीमां 300 ठौडां दबिश दे र 258 असामाजिक तत्वां ने पकड़्या। ई बीचे राज्य रा मुख्य निर्वाचन अधिकारी प्रवीण गुप्ता आकाशवाणी सागे बातचीत करता थकां कह्यो के चुनाव आदर्श आचार संहिता री पालना करडाई ऊं करावण सारू सगळा जतन कर्या जा रह्या है।

000

000

देश मांय लोकसभा चुनाव ऊं जुडी सियासी हलचल तेज व्हे गयी है। कांग्रेस पार्टी रा चुनाव घोषणापत्र ने मंजूरी देवण सारू नई दिल्ली मांय कांग्रेस कार्यसमिति री आज मीटिंग व्ही। मीटिंग मांय कांग्रेस अध्यक्ष मल्लिकार्जुन खरगे, पैली वाळा अध्यक्ष सोनिया गांधी अर राहुल गांधी, प्रियंका गांधी वाड्रा, पी. चिदम्बरम, दिग्विजय सिंह, अजय माकन अर के. सी. वेणुगोपाल समेत केई आला नेता शिरकत कीनी। दूजी कानी भारतीय जनता पार्टी री क्लस्टर संभाग स्तरीय बैठक आज जोधपुर मांय राख्थी ज्यी। इण मांय मुख्यमंत्री भजन लाल शर्मा, जल शक्ति मंत्री गजेंद्रसिंह शेखावत, राज्य रा चिकित्सा मंत्री गजेंद्रसिंह खींवर अर कानून मंत्री जोगाराम पटेल समेत जनता रा केई नुमाइंदा शिरकत कीनी। मीटिंग मांय मुख्यमंत्री भजन लाल शर्मा लोकसभा चुनाव री रणनीति बणावण सारू सगळी सीटां रा बारा मांय चर्चा कीनी। मीटिंग पाछे मुख्यमंत्री उदयपुर मांय भाजपा री क्लस्टर कार्यकर्तावां री मीटिंग मांय शिरकत कीनी। ध्यानजोग है कि प्रदेश मांय भाजपा हाल ताई 15 अर कांग्रेस 10 सीटां माथे उम्मीदवारां रा नाम रो ऐलाण कर दीनो है।

000

लोकसभा चुनाव मांय वोट देवण बाबत् जाग जगावण सारु आकाशवाणी समाचार जयपुर री ओर ऊं संदेश श्रृंखला सारु करी ज्यी है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है उदयपुर जिला रा राजेश पुष्करणा रो संदेश -

000

राष्ट्रीय महिला आयोग अर रेलवे सुरक्षा बल मानव तस्करी रोकण सारु करार कीनो है। आयोग री अध्यक्ष रेखा शर्मा बतायो के रेलवे टेसनां माथे तैनात रेलवे सुरक्षा बल रा कर्मचारी, महिलावां अर बच्चां रे खिलाफ व्हेवण वाळा अपराध रोकण मांय खास काम करे है। वे कह्यो के मानव तस्करी रा 70 फीसदी मामला महिलावां अर टाबरियां ऊं जुड्या है। ई मौके रेलवे सुरक्षा बल रा महानिदेशक मनोज यादव कह्यो के ई करार रो मकसद महिलावां ने सुरक्षित सफर रो सुबीतो मुहैया करावणो है।

0000

सीकर जिला मांय खाटूश्याम जी रो मेळो भर रह्यो है, जिण मांय मोटी तादाद मांय देश-परदेश ऊं जातरु पूग रह्या है। काल खास मेळो भरेला। हाल ताई दस लाख ऊं बत्ता जातरु श्याम बाबा रा दर्शन कर लीना है। ई बीच भरतपुर संभाग रा डीग जिला मांय आज ऊं तीन दिन रो ब्रज होली महोत्सव सारु व्ह्यो। आज पहला दिन मेला मैदान मांय रस्साकशी, कबड्डी, मटका फोड़, नींबू-चम्मच दौड़ समेत न्यारी-नयारी होड़ां राख्यी ज्यी। महोत्सव रे दौरान रंग-रंगीला फव्वारा चलाया जा रह्या है। टोंक जिला रा देवली मांय ई केई ठोडां आज फागोत्सव मनायी ज्यो। ई दौरान मिंदरां मांय भजन पेश करी ज्यो।

000

राजस्थान हाईकोर्ट प्रदेश मांय जंगल, कुदरती साधनां, डूंगरियां, पाणी रा स्त्रोतां अर आरक्षित अर संरक्षित हलकां मांय गैर कानूनी कब्जां माथे गहरी चिंता जतायी है। अदालत राज्य सरकार ने वैज्ञानिक तरीका ऊं सेटेलाइट रे जरिये निगराणी राखण रा हुकम दीना। न्यायमूर्ति डॉ. पुष्पेंद्र सिंह भाटी अर न्यायमूर्ति मुन्नूरी लक्ष्मण री खंडपीठ जोधपुर मांय जंगलात हलकां माथे गैर कानूनी कब्जा रा बारा मांय दायर जनहित याचिका की सुणवाई करता थकां महाधिवक्ता राजेंद्र प्रसाद ने अनुपालना रपट दाखिल करण रो हुकम दीनो। खंडपीठ सरकार ने लारला 24 साल री एक चरणबद्ध रपट पेश करण सारु कह्यो। अदालत कह्यो के ई रपट सारु सरकार, सेटेलाइट मैपिंग, जियो टैगिंग अर डेटा प्रबंधन रा जाणकारां री सेवा ले सकेला।

0000